

汉魏丛书

漢魏丛书

叅同契序

夫道一而已矣而言道者大宗三曰
羲文曰黃曰老易言天契人老言人
契天陰符言天人之契合自仲尼繫
生生存存而易未嘗非元自莊周寓
南溟北溟而元未嘗不易易元之交

符在焉古未有演其宗以一故伯陽
真人紹十翼七篇而契作其文著明
八卦三才密藏發機陰陽相勝食時
合符之自然微而喻詳而妙契一符
也同兩合也叅三易化也於經三宗
於造化三極於身三物三寶化得合

合得符符乃一得一道畢故謂易有
太極契行而其後方術之家奉于禘
祖大宗師然而多不得其解以支傍
流通何道爲天下裂也夫道一而已
而易之宗傳牽于理筌人執于數符
之宗詭於兵淫於房老之宗假於術

引於法衍於符籙何者聖人以道之
不可言往往因象傳理迹事章化寄
名宏法故莊曰弔詭曰寓言曰埃及
知者旦暮遇之不知者無蝕吾道已
矣而後人緣不知以希神泥事象以
証真執名以習道不大鑿乎嗚呼安

在於名非名有畫而無字乎故自周
易道德以下皆寓也筏筌也假以入
而非其所以入又况執其入而岐之
魚將終不得河將終不渡沉一生於
情波慾海沒不出爾矣而瞽然命曰
是道是契是易將眩之安息而市之

海夢之化城果且真乎哉非耶夫曰
周易參同契同契易也易自宓義後
有三連山歸藏周易寅統人用其交
止作始丑統地用其合歸育元子統
天用其復周環而化三義承循三才
運周周而易備矣上古之人樸用先

天無爲中古之人澆用後天有以合
無爲入無爲周于天之元而生於人
之復生生不息則叅符以契人何一
息不在易中哉故人天地之德陰陽
之交函一麗兩苞內落外而方士左
道動援契入彼家又岐外事至命曰

煉已煉彼煉外曰參同嗚呼賊先聖
之道此說也裊天下萬世之爲道此
說也彼索其牝牡汞鉛交構烹煉而
不得則假而物於象然則易之男女
老之母子將皆物與長春入道二十
年始讀契厭其有象求之無已証無

而知有象一無象也然後知契出于
符而叅于易後世言道亦用易十二
卦止爾攢歲月日時用有而脩之不
知四象應四正八卦從八風六陰六
陽消長爲一月先後天交錯爲十二
令中而星紀之爲二十四氣通八卦

之變而爲三百六十日二陸三道登
沒繩鉤時而周符自然也乃易未嘗
不契人有人不契耳故曰動靜休息
常與人俱立天之道以定人予十四
年辟穀十二年絕房十年與天通則
按易定關按至分候節晦朔弦望晝

夜晨夕時符功行以語人無有信聞
爲發願欲著道演一合易老符契之

旨而各通爲一解爲証入歲異未敢

下今從直指鄭寰樞公談道山中點

校是編以就正鄭君喜之因索序付

梓云九洞天符道人朱長春撰

右參同契三十四章通考本作周易參同契三卷
晁氏云漢魏伯陽撰伯陽會稽上虞人約周易作
此書以授同郡淳于叔通因行於世隋唐書皆不

載按唐陸德明解易字云虞翻注參同契言易字
從日下月今此書有日月爲易之文其爲古書明
矣朱子以其詞韻皆古奧難通讀者淺聞妄輒更
改比它書尤多舛誤乃合諸本更加讎正爲之考
異又謂參同契爲艱深之詞使人難曉而其中有
千周萬遍之說欲令熟讀以得之也鄱陽馬氏以

此爲道家煉養之術謂歐陽文忠公嘗刪正黃庭
朱文公嘗稱參同契二公大儒攘斥異端不遺餘
力獨不以其說爲非山林獨善之士以此養生全
年因未嘗得罪於名教也朱長春真人序此書又
以爲出於陰符而參於易皆爲道家大宗而謂之
參同契者言同契於易也故朱氏經義考以附周
易今仍叢書原本列入諸子且以次陰符經後云
汝上王謨識

叅同契總目

乾坤設位章

日月懸象章

聖人上觀章

君臣御政章

煉已立基章

明知兩竅章

明辨邪正章

龍虎兩弦章

金返歸性章

二土全功章

同類合體章

三聖前識章

金丹刀圭章

水火性情章

陰陽精氣章

君子居室章

晦朔合符章